

**Kommunit Namminersorlutillu Oqartussat
missingersuutaat naatsorsuutaallu pillugit
Inatsisartut inatsisaata allanngortinneqarnissaa
pillugu Inatsisartut inatsisaat
(Missingersuutit inissisimanerannik
naatsorsueriaatsimik allannguneq, nammineq
aningaasaatinik naleqqussaanissamut
ataasiaannartumik akuersissut aamma pisortat
ataatsimoorlutik qarasaasiaat pillugit
malittarisassanik erseqqissaaneq)**

§ 1

Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni nr. 26, 28. november 2016-imeersumi, Inatsisartut inatsisaanni nr. 24, 28. november 2018-imi allanngortinneqartumi, tulluuttut allannguutigineqarput:

1. § 2 ima oqaasertalerneqassaaq:

” **§ 2.** Missingersuutit tamarmiusut kommunimi imaluunniit Namminersorlutik Oqartussani ukiut sisamat ingerlaneranni oqimaaqatigiissinneqassapput imaluunniit sinneqartoorfiussapput, taamaattoq imm. 3 takuuk.

Imm. 2. Missingersuutit oqimaaqatigiissinneqarnissaannik piumasaqaat imm. 1-imi pineqartoq naammassineqarsimassaaq, kommunip ukiumoortumik missingersuutaani, ukiunut arlalinnut missingersuutit ilanngullugit imaluunniit Namminersorlutik Oqartussat aningaasanut inatsisaat, ukiunut arlalinnut missingersuutit ilanngullugit:

1) sanaartornermut, ingerlatsinermut, isertitanut aamma tapiissutinut atatillugu inerneru tamarmiusut amigartoorfunngippata, aamma

2) ingerlatsinermut, tapiissutinut sanaartornermullu aningaasaliissutit tamarmiusut ukiumi ataatsimi annerpaamik 1,00 procentimik qaffassimappata aamma ukiut sisamat ingerlanerini ataatsimut qaffariaataat annerpaamik 2,00 procentiuppat.

Imm. 3. Inatsisartut akuersissuteqarnerisa kingorna imm. 2 malillugu naatsorsuineru aningaasartuutit ineqarnermut, inuussutissarsiornermut imaluunniit ataqatigiimmik aaqqissuussinernut suliniutinut

anigaasaliinernut atatinneqarsinnaasut ilanngunneqassanngillat, sunniutissanik nalilersuineq malillugu ataatsimut isigalugu inuiaqatigiit anigaasaqarneranut iluanaarutaasut nalilernerqarpat.

Imm. 4. Imm. 2 nr. 2-mi procentit annertussusaat taaneqartut ukiuni kingullerni pingasuni innuttaasut amerliartornerannik Naatsorsueqqissaartarfiup 1. januaari eqqorluarlugu nalunaarsugaasa agguaqatigiissinnerata 80 pct.-iannik qaffanneqarput.

Imm. 5. Imm. 2 nr. 2-mi procentit annertussusaat taaneqartut ukiunut pingasunut 1. januaari eqqorluarlugu innuttaasut ikiliartornerannik Naatsorsueqqissaartarfiup kingusinnerpaamik nalunaarsugaasa agguaqatigiissinnerata 50 pct.-iannik ikilineqarput. Imm. 2 nr. 2-mi procentit annertussusaat taaneqartut ukiumut annerpaamik 0,25 pct. pointinik ikilineqarsinnaapput.

Imm. 6. Imm. 2-mi procentit annertussusaat taaneqartut ukiut aningaasanut inatsiseqarfiup tulliani aningaasaliissutinit agguagarsiap amerlassusiata assinganik qaffanneqassapput, ukiut aningaasanut inatsiseqarfiusut siuliini naatsorsuinerni aningaasat amerlassusaat nuunneqartut ilanngullugit naatsorsorneqarsimappata.

Imm. 7. Imm. 2-mi procentit annertussusaat taaneqartut anigaasaqarnermi ukiup tulliani aningaasaliissutinit agguagarsiap amerlassusiata assinganik qaffanneqassapput, naatsorsuinermi piffissap iluani aningaasat amerlassusaat kommuninit imaluunniit Namminersorlutik Oqartussanit suliassanut nuunneqartunut atatillugit tiguneqarsimappata. Taamatut pisoqartillugu imm. 2-mi procentit annertussusaat taaneqartut ukiut aningaasanut inatsiseqarfiup tulliani aningaasaliissutinit agguagarsiap assinganik millineqassapput, naatsorsuinermi piffissap iluani aningaasat amerlassusaat kommuninit imaluunniit Namminersorlutik Oqartussanit suliassanut nuunneqartunut atatillugit tiguneqarsimappata”

2. § 4 ima oqaasertalerneqassaaq:

“ § 4. Naalakkersuisoq, Naalakkersuisut Siulittaasuata erseqqinnerusumik aalajangiineratigut piginnaatinneqartoq, ukiut tamaasa februaarip naannginnerani kommunit aamma Namminersorlutik Oqartussat ukiut aningaasanut inatsiseqarfiut sisamat siuliinut missingersuusiaasa inissisimanerannut naatsorsuutininik suliaqartassaaq. Naatsorsuutininik tamanut saqqummiussinissaq sioqqullugu Anigaasaqarnermut Siunnersuisoqatigiinnut oqaaseqaateqarfigineqartussanngorlugit saqqummiunneqartassapput.

Imm. 2. Naalakkersuisoq, Naalakkersuisut Siulittaasuata erseqqinnerusumik aalajangiinera malillugu tamatumunga piginnaatinneqartoq, ukiut tamaasa apriliip naannginnerani ukiut aningaasanut inatsiseqarfiusut tullit sisamanut kommunini aammalu Namminersorlutik Oqartussani aningaasanut § 2, imm. 2, nr. 2-mi taaneqartunut tunngavigineqartunik naatsorsuutininik suliaqartassaaq. Naatsorsuutininik saqqummiussinissaq sioqqullugu kommuninut oqaaseqaateqarfigineqartussanngorlugit saqqummiunneqartassapput.”

3. § 13-imi immikkoortoq 4-tut ilanngunneqassaaq:

” *Imm. 4.* Namminersorlutik Oqartussat illuutaanik aalaakkaasunik, sanaartugaataanik pigisaanillu nalilinnik allanik ingerlaavartumik aserfallatsaaliuinnermut aamma nutarsaanermut aningaasanut inatsimmi aningaasanik immikkoortitsisoqarnissaa pillugu malittarisassanik Naalakkersuisut aalajangiisnaapput.”

4. §§ 14-17 ima oqaasertalerneqassapput:

” § 14. Sanaartugassanut iluarsagassanullu anigaasaateqarfik taamaallaat missingersuutininut

naatsorsuutinullu teknikikkut aningaasaateqarfiuvoq, Nunatta Karsiani ilaasoq.

Imm. 2. Sanaartugassanut iluarsagassanullu aningaasaateqarfimmi Nunatta Karsianit sanaartornermut aningaasaliissutit isertitatut nalunaarsorneqassapput. Tamanna aamma sanaartornermut aningaasaliissutitut, Inatsisartut aningaasaqarnermut ataatsimiititaliaanit kingusinnerusukkut akuerineqarsimasunut aamma § 13, imm. 4 naapertorlugu aningaasaliinernut tunniunneqarsimasunut atuuppoq.

Imm. 3. Sanaartornermi suliniutit aningaasartuutaat Sanaartugassanut iluarsagassanullu aningaasaateqarfimmi aningaasartuutitut nalunaarsorneqassapput.

Imm. 4. Aningaasaqarnermut ukiut akornanni akiliutigineqartut nikingassutaat Sanaartugassanut iluarsagassanullu aningaasaateqarfimmi oqimaaqatigiissinneqartassapput.

Imm. 5. Sanaartornermi suliniutini ataasiakkaani katillugu aningaasartuutitut aningaasaliissutigineqarsimasunit aningaasartuutikinnerunermeri sinneruttut, suliniutip naammassineqarnerani Nunatta Karsianut utertinneqartassapput.

§ 15. Naalakkersuisoq, Naalakkersuisut Siulittaasuata aalajangiineranit piginnaatinneqartoq, Sanaartugassanut iluarsagassanullu aningaasaateqarfiup ingerlatsineranut missingersuutitut aamma aningaasaliinermut tunngasunik aalajangersaassaaq.

§ 16. Naalakkersuisoq, Naalakkersuisut Siulittaasuata aalajangiineranit piginnaatinneqartoq, Sanaartugassanut iluarsagassanullu aningaasaateqarfimmik ingerlaavartumik aqutsinermut siulersuissaaq.

§ 17. Naalakkersuisut Sanaartugassanut iluarsagassanullu aningaasaateqarfimmi ingerlatat pillugit Inatsisartunut ukiumoortumik nalunaarusiortassapput, ilagalugit suliniutitut nutaanut, suliniutitut ingerlasunut aamma naammassineqarsimasunut imaluunniit suliniutitut taamaatiinnarneqarsimasunut, taama tulleriillutik, immikkut killiffiit.

Imm. 2. Nalunaarusiaq suliniutit suussusaannut aamma suliniutitut eqimattakkaanut immikkoortiterneqassaaq ima, nutaamik pissarsinissamut aningaasaliissutit aamma aserfallatsaaliuinermit iluarsagassanullu aningaasaliissutit akornanni immikkoortitsisoqarluni.”

5. § 20-p kingorna ilanngunneqassaaq:

” § 20 a. Kommunalbestyrelsit kommunimut sanaartugassanut iluarsagassanullu aningaasaateqarfimmik pilersitsinissaa akuerisinnaavaat. Aningaasaateqarfik missingersuutitut naatsorsuutinullu teknikikkut aningaasaateqarfiuvoq kommunip karsiani ilaasoq.

Imm. 2. Sanaartugassanut iluarsagassanullu aningaasaateqarfimmi ukiumoortumik missingersuutit sanaartornermut aningaasaliissutit aamma sanaartornermut aningaasaliissutit tapiliussatut aningaasaliissutitut akuerineqarsimasut isertitatut nalunaarsorneqassapput.

Imm. 3. Sanaartornermi suliniutit aningaasartuutaat sanaartugassanut iluarsagassanullu aningaasaateqarfimmi aningaasartuutitut nalunaarsorneqassapput. Ukiut aningaasanut inatsiseqarfiit akornanni akiliutigineqartut nikingassutaat sanaartugassanut iluarsagassanullu aningaasaateqarfimmit oqimaaqatigiissinneqassapput. Sanaartornermi suliniutini ataasiakkaani katillugu aningaasartuutitut aningaasaliissutigineqarsimasunit aningaasartuutikinnerunermeri sinneruttut, suliniutip

naammassineqarnerani kommunip karsianut utertinneqartassapput.

Imm. 4. Aningaasaqarnermut ataatsimiititaliaq Sanaartugassanut iluarsagassanullu aningaasaateqarfimmi ingerlatat pillugit kommunalbestyrelsimut ukiumoortumik nalunaarusiortassaaq, ilagalugit suliniutunut nutaanut, suliniutunut ingerlasunut aamma naammassineqarsimasunut imaluunniit suliniutunut taamaatiinnarneqarsimasunut, taama tulleriillutik, immikkut killiffiit.”

6. § 42, imm. 1, ima oqaasertalerneqassaaq:

” Kommunip naatsorsuutai aningaasaqarnermut ataatsimiititaliamit kommunalbestyrelsimut saqqummiunneqassapput. Naatsorsuutunut ilaatinneqassapput:

- 1) kukkunersiuisumit nassuiaatit,
- 2) kommunip qularnaveeqqusiinerinut, attartornerinut, attartortitsinerinut aamma qularnaveeqqusiissuteqarnermi pisussaaffinut nalunaarsuutit,
- 3) pisariaqartitsineq naapertorlugu pissutsit qanoq ittuunerannut nassuiaatit, minnerunngitsumik aningaasaliissutaasut naatsorsuutaasullu malunnaatilimmik nikingassuteqarneranni, aamma
- 4) kommunip aningaasaliiffigisassatut pilersaarutaanut, ukiunut arlalinnut missingersuusiaanut il. il. tunngatillugit pissutaasunut nassuiaatit.

7. § 42-p kingorna ilanngunneqassaaq:

” **§ 42 a.** Kommunip kingusinnerpaamik ukiumi naatsorsuiffiusumi 2023-mi atuutilertussamik kommunip pissarsiassai akilerneqanngitsut isumakkeerfiginerisigut nammineq aningaasaatimi aaqqiiviginissaanut Naalakkersuisut akuersissuteqarsinnaapput. Pissarsiassat nalikilliliiffissamit ukiunik marlunnik sivikinnerusumik akilerneqartussaasimasut akuersissummi ilaatinneqarsinnaanngillat. Taamatut akuersissuteqarnissamut atugassarititaasunik piumasaqaatinillu erseqqinnerusunik Naalakkersuisut aalajangiisinnaapput, tassungalu ilanngullugu akiligassat qanoq ittut akuersissummut ilaatinneqarsinnaanerat aalajangersinnaallugu.”

8. § 43, imm. 1, uniffik siulleg atorunnaarsinneqassaaq.

9. § 46 a, imm. 1 aamma 2, ima oqaasertalerneqassapput:

” **§ 46 a.** Naalakkersuisut Pisortat ataatsimoorlutik qarasaasianik ingerlatsinerannut siulersuisut inassuteqareernerisigut, aamma kommunit tusarniarneqareernerisigut, alajangersinnaavaat:

- 1) qarasaasiat sorliit pisortani ataatsimoorussatut isigineqassanersut, aamma
- 2) kommunit aamma Namminersorlutik Oqartussat pisortat ataatsimoorlutik qarasaasiat sorliit atussaneraat, tassungalu ilanngullugu pisussaaffik kommuninut tamanut aammalu Namminersorlutik Oqartussanut imaluunniit taakku ilaannaannut atuutissanersoq.

Imm. 2. Naalakkersuisut kommunit Namminersorlutik Oqartussallu peqatigalugit pisortat qarasaasianik ataatsimoorlutik pisaarnissamut, ingerlatsinermut ineriartortitsinermullu aaqqissuussaaneermik pilersitsinissaat pillugu malittarisassanik aalajangiisinnaapput. Naalakkersuisut matuma ataani, aaqqissuussaaneq qanoq aqunneqassanersoq, alajangiinermi tunngaviit suut malillugit pisortani qarasaasiat ataatsimoorussatut isigineqassanersut, aaqqissuussaaneq aningaasartuutai kommunit Namminersorlutillu Oqartussat akornanni qanoq agguarneqassanersut, aaqqissuussaaneq kommunit

aamma Namminersorlutik Oqartussat avataanni allanut sullissilluni suliaqarsinnaanersoq il. il. malittarisassanik aalajangiisinnaapput.”

10. §§ 49 aamma 50 atorunnaarsinneqassapput.

§ 2

Inatsisartut inatsisaat ulloq 1. januar 2022 atuutilissaaq, inatsisillu atuutilerneranit ukiumoortumik missingersuutitut aningaasanullu inatsisinut akuersissutigineqartunut atuulluni.

Imm. 2. Inatsisip atortuulersinneqarnerani Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-imeersumi §§ 21-24 atorunnaarsinneqassapput.

Imm. 3. 2023-mut § 2, imm. 2, nr. 2-mi naatsorsuutit killiffii taaneqartut, Inatsisartut inatsisaanni § 1, nr. 1-imi matumani oqaasertaliorneqartutut ukiut aningaasanut inatsiseqarfiit sisamani tulluuttuni kommuninut tamanut aamma Namminersorlutik Oqartussanut, kommunit ukiumoortumik missingersuutaat aamma Namminersorlutik qartussat 2021-mut Aningaasaqarnermut inatsisaat ilassutitullu aningaasaliissutit 1. januar 2022 sioqqullugu akuerineqarsimasut tunngavigalugit, ukiumoortumik missingersuutit maluunniit aningaasanut inatsit akuerineqarsimasut 1,50 procentimik ilassuserlugu killigitat aalajangerneqassapput. Naalakkersuisoq taanna Naalakkersuisut Siulittaasuata erseqqinnerusumik aalajangiineratigut tamatumunga piginnaatinneqartoq, 2022-mi apriliip naannginnerani naatsorsuutininik suliaqassaaq.

Imm. 4. Naatsorsuutitut § 4, imm. 1-imi taaneqartunut taamaallaat ilaapput ukiut aningaasanut inatsiseqarfiusut Inatsisartut inatsisaata atuutilernerata kingorna naammassineqartut, 2023-milu februaarip naannginnerani siullermik suliarineqartut.

Namminersorlutik Oqartussat, ulloq 1. december 2021

Múte Bourup Egede
Naalakkersuisut Siulittaasuut

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut